

ЎЗБЕКИСТОН РЕСПУБЛИКАСИ
ПРЕЗИДЕНТИНИНГ
ҚАРОРИ



ПОСТАНОВЛЕНИЕ
ПРЕЗИДЕНТА
РЕСПУБЛИКИ УЗБЕКИСТАН

2018 йил „ 27 “ апрель № ПҚ-3682 „ _____ “ _____ 20 г.

Инновацион ғоялар, технологиялар ва лойиҳаларни амалий жорий қилиш тизимини янада такомиллаштириш чора-тадбирлари тўғрисида

Ишлаб чиқаришни модернизация қилиш, техник ва технологик жиҳатдан янгилаш жараёнларига илмий-амалий тадқиқотлар натижаларини ва ноу-хау ишланмаларни кенг жорий этиш, ушбу йўналишда илмий муассасалар ва реал иқтисодиёт тармоқлари корхоналари ўртасида яқин ҳамкорликни ўрнатиш мамлакатни жадал инновацион ривожлантиришнинг муҳим омили ҳисобланади.

Шу билан бирга, инновацион ғоялар, технологиялар ва лойиҳаларни тўлақонли реализация қилиш, уларни хорижий инвестицияларни жалб қилишнинг долзарблигини ҳисобга олган ҳолда ишлаб чиқариш тармоқларига амалий жорий қилишга салбий таъсир кўрсатаётган бир қатор омиллар мавжуд. Хусусан:

биринчидан, хорижий инновацион ва илмий марказларни, етакчи инвестицион фондларни, технологик агентликларни, технопарклар ва бошқа манфаатдор субъектларни маҳаллий инновацион ишланмаларни амалга оширишда иштирок этишга фаол жалб этиш борасида етарли даражада чора-тадбирлар амалга оширилмаяпти;

иккинчидан, давлат органлари ва хусусий сектор вакиллари, эркин иқтисодий ва кичик саноат зоналари иштирокида ишлаб чиқариш жорий этилган ва муваффақиятли қўлланилаётган технологияларни намоёниш этиш даражаси пастлигича қолмоқда;

учинчидан, қулай инвестицион муҳитни шакллантириш, инновацион ғоялар ва лойиҳаларни ишлаб чиқиш ва жорий этиш соҳасига инвестицияларни кенг жалб қилиш, илғор ва илмий ҳажмдор технологияларни фаол тарқатишнинг самарали тизими мавжуд эмас;

тўртинчидан, республика вилоятлари кесимида илмий ва инновацион фаоллик паст, бир иштирокчининг қайта-қайта жалб этилиши эса, ҳар йилги тақдим қилинадиган инновацион ишланмалар ва маҳаллий амалий тадқиқотларга бўлган буюртмалар портфел тематикаларининг такрорланишига олиб келмоқда;

бешинчидан, технологияларни тижоратлаштириш ва уларни ташқи бозорларга олиб чиқиш, миллий инновацион тизимни шакллантириш бўйича амалий тавсиялар ишлаб чиқиш жараёнларига кўмаклашишнинг амалдаги механизмларининг самараси паст ва кутилган натижаларни бермаяпти.

Инновацион инфратузилмани янада шакллантириш, тадбиркорликни, инвестицион салоҳиятни ривожлантириш учун қулай шароитлар яратиш, инновацион ғояларни, технологиялар ва лойиҳаларни ишлаб чиқариш жараёнига кенг жорий қилиш ҳамда 2017-2021 йилларда Ўзбекистон Республикасини ривожлантиришнинг бешта устувор йўналиши бўйича Ҳаракатлар стратегиясида белгилаб берилган вазифаларга мувофиқ:

1. Ўзбекистон Республикаси Инновацион ривожланиш вазирлиги ва Инвестициялар бўйича давлат қўмитасининг 2018 йилдан бошлаб ҳар йили хорижий инновацион ва илмий марказлар, инвестицион фондлар, технологик агентликлар, технопарклар ва бизнес-инкубаторларнинг фаол иштирокида халқаро интерактив инновациялар ярмаркаларини (кейинчалик – инновациялар ярмаркалари) ва халқаро инновацион-инвестицион форумларни (кейинчалик – халқаро форумлар) ўтказиш бўйича таклифлари маъқуллансин.

2. Инновациялар ярмаркалари ва халқаро форумларни ўтказишнинг асосий мақсадлари этиб қуйидагилар белгилансин:

давлат органлари, эркин иқтисодий ва кичик саноат зоналари, технопарклар ва хусусий тадбиркорлар, шунингдек иқтисодиётнинг реал секторини академик ва тармоқ илмий-тадқиқот муассасалари билан етакчи хорижий инвестицион фондлар, инновацион марказлар ва бошқа манфаатдор ташкилотлар вакиллари иштирокидаги ўзаро ҳамкорлигини таъминлаш;

Ўзбекистон Республикасида ва етакчи хорижий мамлакатларда технологияларни трансфер қилиш жараёнлари шунингдек, реал иқтисодиёт тармоқлари ва хусусий тадбиркорлик корхоналарида ишланмаларни жорий қилишнинг натижалари билан амалий танишиб чиқишни таъминлаш йўли билан маҳаллий инновацион ғоялар, технологиялар ва лойиҳаларнинг тижоратлаштириш учун шароитлар яратиш;

инновацион ғоялар, технологиялар ва лойиҳаларни ишлаб чиқиш ва жорий қилиш соҳасига инвестицияларни кенг жалб қилиш, ички ва ташқи бозорларда жамоат ва хусусий секторлардан илғор ва илмий ҳажмдор технологияларни фаол тарқатиш;

бозор иштирокчилари ўртасида ҳамкорликни кенгайтириш, тармоқ корхоналарининг жадал ривожланишига кўмаклашадиган минтақавий ва халқаро алоқаларни ривожлантириш, илмий-тадқиқот муассасалари, хусусий тадбиркорлик ва инвесторлар ўртасида кооперацион алоқаларни кенгайтириш;

халқаро инновацион-инвестицион форумлар, конференциялар, давра суҳбатлар, тренинглар, маҳорат дарслари ва бошқа тадбирларни ўтказиш;

илмий-тадқиқот, инновацион ва ихтиро ғоялари, технологиялари ва лойиҳаларининг доимий асосда фаолиятни амалга ошириладиган ва тўлдириб бориладиган маълумотлар базасини яратиш.

3. Шундай тартиб ўрнатилсинки, инновациялар ярмаркасини ташкил қилиш тизими қуйидагиларни ўз ичига олади:

биринчи блок «**Ташаббускор бизнес**» – Ўзбекистон Республикаси ҳамда илғор хорижий мамлакатларнинг давлат ва хусусий секторлари томонидан маҳаллий ва хорижий технопарклар, технологик агентларнинг тайёр илмий ва инновацион ишланмалар натижаларини ва технологияларни тижоратлаштириш соҳасидаги фаолиятини ёритиш учун ташкил этилган кўرғазма майдони;

иккинчи блок «**Инновацион ечимлар**» – ички ва ташқи бозорларга чиқиш мақсадида давлат ва хусусий илмий муассасалари томонидан макет ва/ёки прототип кўринишида энг зўр маҳаллий илмий ва инновацион ишланмаларни намоёни қилиш;

учинчи блок «**Кооперацион алоқалар**» – мулоқот ва ўзаро фойдали ҳамкорликни йўлга қўйиш, шерикчилик ва иқтисодиётнинг айрим тармоқлари соҳасидаги долзарб масалаларни кўриб чиқиш учун зарур бўлган қарорларнинг миқёсини кенгайтириш учун платформа.

4. Белгилаб қўйилсинки:

инновациялар ярмаркаларни ўтказиш жойи «Ўзэкспомарказ» миллий кўргазма комплекси» акциядорлик жамияти (кейинчалик – «Ўзэкспомарказ» АЖ)нинг кўргазма павильонлари ҳисобланади;

инновациялар ярмаркаларини ҳар йили ўтказиш Ўзбекистон Республикаси Инновацион ривожланиш вазирлиги, Иқтисодиёт вазирлиги, Ташқи ишлар вазирлиги, Инвестиция бўйича давлат қўмитаси ва Савдо-саноат палатаси томонидан ташкил этилади;

инновациялар ярмаркаларини ўтказишнинг муддати ва даврийлиги Ўзбекистон Республикаси инновацион ривожланиш вазири томонидан белгиланади.

5. Ўзбекистон Республикаси инновацион ривожланиш вазири зиммасига хорижий инновацион ва илмий марказлар, инвестицион жамғармалар, техник агентликлар, технопарклар ва бизнес-инкубаторларни жалб қилган ҳолда ҳар йилги инновациялар ярмаркалари ва халқаро форумларни юқори даражада ташкил қилиш учун шахсий жавобгарлик юклатилсин.

6. «Ўзэкспомарказ» АЖга инновациялар ярмаркаларининг иштирокчиларига зарурий кўргазма майдонларини ва конференция залларини кўргазмаларни ташкил қилиш ва ярмаркани ўтказиш учун ўрнатилган тарифдан 30 фоизлик чегирма билан тақдим этиши юзасидан тавсия берилсин.

7. Белгилаб қўйилсинки, инновациялар ярмаркалари ва халқаро форумларни ташкил қилиш ва ўтказиш билан боғлиқ харажатлар хўжалик бошқаруви органлари ва йирик давлат корхоналаридаги инновацион фаолиятини қўллаб-қувватлаш жамғармаларининг жами маблағлари 10 фоизи миқдори ҳисобидан қопланади.

8. Ўзбекистон Республикаси Ташқи ишлар вазирлиги:

ҳар йил ўтказиладиган инновациялар ярмаркалар ва халқаро форумларда хорижий инновацион ва илмий-марказлар, инвестицион фондлар, технологик агентликлар, технопарклар, бизнес-инкубаторлар ва бошқа манфаатдор субъектларнинг иштирокини таъминласин;

Ўзбекистон Республикаси Инновацион ривожланиш вазирлиги талабномаларига биноан инновациялар ярмаркалари ва халқаро форумларнинг хорижий мутахассис-иштирокчилари учун кириш визаларини белгиланган тартибда расмийлаштирилишини таъминласин.

9. Ўзбекистон Республикаси Инновацион ривожланиш вазирлиги:

Ўзбекистон Республикаси Адлия вазирлиги билан биргаликда бир ой муддатда қонун ҳужжатларига ушбу қарордан келиб чиқадиган ўзгартиш ва қўшимчалар тўғрисида Вазирлар Маҳкамасига таклифлар киритсин;

Ўзбекистон Республикаси Ахборот технологиялари ва коммуникацияларини ривожлантириш вазирлиги билан ҳамкорликда уч ой муддатда ўзида инновациялар ярмаркалари ва халқаро форумларнинг барча амалдаги ва салоҳиятли иштирокчилари тўғрисидаги ахборотлар ҳамда тижоратлаштириш учун тайёр бўлган инновацион ишланмалар ҳақидаги маълумотларни жамлайдиган, доимий янгиланиб турадиган «Инновацияларнинг виртуал ярмаркаси» интерактив Интернет-портални ишлаб чиқилишини ва фаолият юритишини таъминласин.

10. Мазкур қарорнинг ижросини назорат қилиш Ўзбекистон Республикаси Бош вазири А.Н. Арипов, Ўзбекистон Республикаси Президентининг Давлат маслаҳатчиси Р.С. Қосимов ва Ўзбекистон Республикаси инновацион ривожланиш вазири И.Ю. Абдурахмонов зиммасига юклатилсин.

**Ўзбекистон Республикаси
Президенти**



Ш.Мирзиёев

Тошкент шаҳри